

Dumonda Degiacomi concernent il commerzi cun umans

Commerzi cun umans è – tenor la definiziun valaivla sin plaun internaziunal – il recrutar, l'offrir, il transferir, l'intermediar, l'alloschar u il recepir umans cun l'intent d'als explotar. En Svizra vegn quai chastià tenor l'artitgel 182 dal Cudesch penal svizzer. Umans vegnan explotads sut sforz en la prostituziun, sco forzas da lavur u sco batlegiaders. Da commerzi cun umans vegni discurt, sch'insatgi vegn recrutà, intermedià ed explotà tras violenza, engion, smanatscha u constringiun (definiziun dal fedpol). Las suffrientschas persunalas chaschunadas qua tras èn infinitas; il donn per l'economia publica è grond.

Sin plaun svizzer è il Post spezialisà per migrantas e victimas dal commerzi cun dunnas (FIZ) in dals paucs posts che sa fatschenta en moda cumpetenta cun il tema e che porscha – en collavuraziun cun l'Uffizi federal da polizia (fedpol) – servetschs impurtants a las persunas pertutgadas sco er als chantuns. Sch'i dat en in chantun p.ex. ina maisa radunda davart il tema commerzi cun umans, vegn quella accompagnada dal fedpol e dal FIZ. Cun il chantun Grischun n'exista dentant nagina cunvegna da cooperaziun correspondent. Sporadicamain s'annunzian – tenor il FIZ – singuls uffizis u posts spezialisads chantunals dal Grischun tar el.

I fiss bel, sch'il chantun Grischun na fiss strusch pertutgà da commerzi cun umans e sch'i n'existiss nagin basegn d'agir. Las explicaziuns d'expertas ed experts locals laschan suspectar che quai n'è betg il cas. Pervia da la pandemia dal coronavirus è la situaziun daventada schizunt anc pli complexa e precara per las victimas dal commerzi cun umans. E pervia da l'ambient economic difficil che la pandemia dal coronavirus ha chaschunà en blers pajais, daventan per il mument probablamain ordvart bleras persunas victimas dal commerzi cun umans.

La Regenza vegn perquai supplitgada da responder las suandantas dumondas en quest connex:

1. Co giuditgescha la Regenza la situaziun en il sector dal commerzi cun umans en il chantun Grischun?
2. Disponan ils uffizis chantunals involvids (p.ex. Procura publica, Polizia chantunala, Agid a victimas, Inspecturat da lavur) da collavuraturas e collavuratur spezialisads?
3. Co vegnan garantids il barat da datas e la collavuraziun entaifer il chantun (p.ex. maisa radunda davart il commerzi cun umans en il Grischun) sco er cun ils uffizis federals (fedpol, SECO) ed ils posts spezialisads (p.ex. FIZ)?
4. È la Regenza da l'avis che las victimas dal commerzi cun umans vegnian cussegliadas, assistidas, accompagnadas e collocadas bain en il Grischun sin tut ils nivels?
5. Tge basegn d'agir exista eventualmain?

Tavau, ils 16 da zercladur 2021

Degiacomi, Favre Accola, Hofmann, Atanes, Baselgia-Brunner, Bondolfi, Cantieni, Caviezel (Cuira), Gartmann-Albin, Horrer, Maissen, Müller (Favugn), Noi-Togni, Perl, Preisig, Rettich, Rutishauser, Ulber, von Ballmoos, Wilhelm, Bürgi-Büchel, Spadarotto, Stieger, Tomaschett (Cuira)